

Waray - Pagliaw Kasuratan - Comfort Scriptures

2 Mga Taga-Corinto 1:2-4 Ihatag unta ha iyo han Dyos nga aton Amay ngan han Ginoo Jesu-Cristo an grasya ug an kalinaw. 3 Magpasalamat kita han Dyos ngan Amay han aton Ginoo Jesu-Cristo, an maloloy-on nga Amay, an Dyos nga burabod han ngatanan nga kalipay! 4 Ginliliaw kita niya ha ngatanan naton nga mga kakurian, basi nga pinaagi han pagliaw nga nakarawat naton ha iya makaliaw man kita hadton may mga kakurian.

Mga Darahonon 15:13 Mahiyomhiyom an mga tawo kon hira malipayon, kundi masulob-on pagkit-on kon hira mabidoon.

1 Hadi 8:66 Ginpauli ni Solomon an mga tawo dida na han ikawalo ka adlaw. Gindayaw hiya nira ngatanan, ngan nanguli hira nga malipayon tungod han ngatanan nga mag-upay nga mga butang nga iginhatag han Ginoo kan David nga iya surugoon ngan han iya mga tawo nga Israel.

1 Mga Cronicas 16:10 Paglipay tungod nga sakop kita niya, maglipay an ngatanan nga nagsisingba ha iya!

Mga Darahonon 12:25 Makakapaguol ha imo an pagkabaraka, kundi makakalipay ha imo an manamit nga mga pulong.

Mga Darahonon 13:12 Kon nakakawang an paglaom, nasasamad an kasingkasing, kundi nagmamalipayon ka kon natutuman an imo ungara.

Isaias 30:26 An bulan masusugad han adlaw hin kamapawa, ngan magpipito ka pilo an kamapawa han adlaw, sugad han kapawa hin kanan pito ka adlaw. Mahinanabo ini ngatanan kon pagbutkon ngan pagtambalon na han Ginoo an mga kasamdan nga iya iginhatag han iya mga tawo han pagkastigoha ha ira.

Oseas 13:8 Dadasmagan ko kamo sugad hin aso nga nawad-an han iya mga nati, ngan pagpipikaspikason ko an iyo lawas. Sugad hin liyon lalamonon ko kamo dida dayon, ngan sugad hin mapintas nga mananap paghuhunothunoton ko kamo.

1 Samuel 1:8-10 Danay pakianhan hiya ni Elcana nga iya bana, “Ana kay ano nga nagtitinangis ka? Kay ano nga diri ka nakaon? Kay ano nga dayuday mabidoon ka man? Diri ba ako nimo minahal labaw pa hin napulo nga mga anak nga kalalaken-an.” 9/10 Usa ka higayon, katapos nira pangaon didto han balay han Ginoo ha Silo, tinmindog hi Ana. Mabidoon gud hiya ngan duro an iya pagtinangis samtang nag-aampo hiya ngadto han Ginoo. Hito nga takna nakadto hi Eli nga padi han iya lingkoran ha ligid han porta.

Salmo 25:16,17 Lingia gadman ako, O Ginoo, ngan kalooyi ako, kay nag-uusaan la ngan maluya ako. 17 Kuhaa an ngatanan nga akon kabaraka ngan talwasa ako tikang han ngatanan ko nga kakurian.

Salmo 34:18 Hiraniay gad la an aton Ginoo hadton mga nahuhulop na hin duro. Tinatalwas niya adton nagugupong, an nawad-an na han tanan nga paglaom. Salmo 38:8 Kinakapoy na gud ako ngan nahirugmok na; masakit an akon kasingkasing ngan nag-aaraba ako hin kamaol-ol.

Salmo 55:4 Nahahadlok gud an akon kasingkasing, ngan binubug-atan ako han mga kangirhat han kamatayon.

Salmo 61:2,3 Dida ha pagturaw ug tikang ha hirayo, nasangpit ug natawag ako ha imo. Dad-a ako ngadto han bato nga arayaban, 3 kay ikaw man an akon sinasarigan; ha akon mga kaaway makusog nga darangpan.

Salmo 62:8 Katawhan ko, an Dyos amo an sarigan, ha ngatanan nga mga kapanahonan; sumati han tanan mo nga kakurian, kay amo man hiya'n aton arayohan.

Salmo 73:26 Hunahuna ug lawas

ko bangin magmaluya, kundi an Dyos, nga kusog ko, an akon ungara.

Salmo 77:2,3 Ha mga panahon han kakurian ko, ha Gino gud la ako nag-aampo. Mag-aga nga ampo alsa'n kamot nakon, kundi hin pagliaw waray la gihapon; 3 Nanhahayhay ako kon Dyos gindudumdom, kon namamalandong, ako nagugupong.

Salmo 86:11 Tutdoi ako, Gino, han imo karuyag, tutdoi ako hin mainampoon nga pag-alagad, nga tutumanon ko hin waray pagbaribad.

Salmo 109:22 Kablas na ako ngan nagkikinahanglan, tugob an akon kasingkasing hin kasakitan.

Salmo 112:7,8 Hiya an

tawo nga waray kahadlokan, han magraot nga sumat nga iya hinbabatian; an pagtoo niya may-ada kadig-onan, kay Gino la an iya sinasarigan. 8 Waray niya kabaraka ug kagupong, waray dida ha iya an kamahadlokon; waray ruhaduha nga iya kikitaon, nga an iya mga kaaway pagpupukanon.

Salmo 143:4 Sanglit andam ako hin pagtubyen, kay tugob ako hin damo nga kasamokan.

Salmo 147:3 Iya gintatambal mga nabibido, ira mga samad ginbubutok ito.

Mga Darahonon 14:30 An murayaw nga hunahuna nakakaupay han panlawas, kundi an pangabugho sugad hin kanser.

Ecclesiastes 1:13 Gintalinguha ko hin pag-usisa ngan pag-aram han ngatanan nga ginbuhat dinhe hini nga kalibutan. Iginpahamtang ha aton han Dyos in makalolooy nga kapalaran.

Ecclesiastes 2:10 Naangkon ko an ngatanan nga akon kinaruyag. Waray ko pagdid-i hin kalipayan an akon kalugaringon. Nalipay ako han ngatanan nga akon ginkabudlayan, ngan amo ini ngatanan an akon balos.

Ecclesiastes 2:22,23 Nagkakabudlay ngan nababaraka ka ha bug-os mo nga kinabuhi, ngan ano man an imo makukuha hini? 23 Samtang buhi ka pa, kabaraka ug kasakit la ha kasingkasing an gindadara han ngatanan nga imo binubuhat. Bisan ha kagab-ihon diri nakakapahuway an imo hunahuna. Waray gudla kapulsanan ini ngatanan.

Ecclesiastes 11:10 Ayaw itugot nga may-ada butang nga makapaguol o makapasakit ha iyo. Diri gud mag-iiha an iyo pagkabatan-on.

Isaias 30:29 Kundi kamo nga tawo han Dyos, magmamalipayon ngan magkakanta kamo sugad han iyo ginbubuhat ha gab-i hin usa nga bараан nga pyesta. Magmamalipayon kamo sugad hadton mga naglalakat nga

tinukaran hin mga plawta dida han ira pagtipakadto han Templo han Ginoo nga mananalipod han Israel.

Isaias 57:15 “Ako amo an gilalabawi ngan baraan nga Dyos, nga buhi ha kadayonan. Nag-uokoy ako didto hin hitaas ngan baraan nga dapit, kundi nag-uokoy liwat ako upod hin mga tawo nga mapinaubsanon ngan mabinasolon, basi makapahiuli ako han ira pagtapod ug paglaom.

Isaias 65:14 Magkakanta hira tungod hin kalipay, kundi magtatangis kamo nga masulob-on an iyo kasingkasing.

Isaias 66:13,14 Pagliliawon ko kamo didto ha Jerusalem sugad hin usa nga iroy ngan nagliliaw han iya anak. 14 Kon hikit-an niyo nga nahinanabo ini, pagmalipayon kamo; magpapakusog ngan magpapalibsog ini ha iyo. Niyan mahibabaroan niyo nga nabulig ako nga Ginoo hadton mga nagsusugot ha akon ngan nagpapakita ako han akon kasina kontra han akon mga kaaway.”

Jeremias 15:16 Naghimangraw ka ha akon, ngan pinamatian ko an kada pulong. Imo ako, O Ginoo nga Dyos nga Labi Kamakagarahum, sanglit nakalipay gud han akon kasingkasing an imo mga pulong.

Jeremias 24:7 Ighahatag ko ha ira an ungara hin paghibaro nga ako amo an Ginoo. Niyan magigin hira maaikon mga tawo ngan ako maiira Dyos, kay mabalik hira ha akon hin kinasingkasing.

Juan 14:1 Nagsiring ha ira hi Jesus, “Ayaw kamo kabaraka ngan kagupong. Too kamo han Dyos ngan too man kamo ha akon.

Juan 14:27 “Ibibilin ko ha iyo an kalinaw; ihahatag ko ha iyo an akon kalinaw. Ihahatag ko ini ha iyo diri sugad han paghatag han kalibutan. Ayaw kamo kabaraka ngan kalisang; ayaw kamo kahadlok.

Juan 16:6 Ngan yana nga ginsumatan ko na kamo, nagsamabidoon kamo.

Juan 16:22 Amo man ini dida ha iyo: mabidoon kamo yana, kundi makikigita liwat ako ha iyo, ngan magmamalipayon gud kamo hin kalipay nga waray makakaagaw ha iyo.

Mga Buhat 2:46 Nagpadayon hira hin pagkaurosa kada adlaw didto ha Templo, ngan didto han ira mga balay nagsasasaro hira hin pangaon ha malipayon ngan mapainubsanon nga mga kasingkasing.

Roma 9:2 nga dako gud an akon kabidoan, nga daw diri matapos an kasakit ha akon kasingkasing tungod han akon mga tawo nga akon gud mga kadugo!

2 Mga Taga-Corinto 2:4 Dako an kabido ngan kabaraka han akon kasingkasing han pagsurat ko ha iyo. Ngan nagsurat ako upod in damo nga mga luha, diri pagbido ha iyo, kundi basi hibaroan niyo kon ano ka dako an akon paghigugma ha iyo ngatanan.

Mga Taga-Efeso 5:19 Magyakan kamo hin mga pulong han mga salmos, mga imno, ngan baraan nga mga karantahan. Magkanta kamo hin mga imno ngan mga salmo ngadto han Ginoo upod in pagdayaw ha iyo mga kasingkasing.

Pastor T. John Franklin

Church of Salvation, Healing, and Deliverance - COS-HAD.org